

rement engendra messire Eddouard, auquel, aprez le trespas de mondit seigneur Anthoine, advint et escheut la baronnye de Beaujeu, comme touchez sera cy apres ; secondement, eust une fille nomme Marye, qui fut femme du seigneur de Sorbornon ; la tierce fut dame Alix, laquelle fut femme du seigneur de Fougerolles, et, aprez la mort dudit seigneur de Fougerolles, elle fut femme du seigneur de Vailly, qui estoit frere du comte de Sancerre, et aprez le trespas dudit seigneur, elle fut femme du seigneur de Cosey ; la quarte fut dame Jane, qui fut femme du seigneur de saint Trivier ; la quinte fut dame Marye, qui fut nonnain de Marcigny-les-Nonnains ; le sixiesme, ung filz nommez Philibert, lequel mourust jeune et fut enterre a Belleville.

Le tres noble Guichard, prudent, saige et hardy en conseil, conduite et devotion à Dieu et aux saints, pitoyable envers les pauvres, chevaleureux et a merveilles, prompt aux armes aultant ou plus que nul aultre de son temps, fut tue à la bataille de Poitiers, en laquelle fut prins par les Angloys le roy Jehan, roy de France, qui y perdit honneur et chevance ; ce fut le vingtiesme jour de septembre, lan mil trois cens cinquante six. Et fut faict sa sepulture moult honorable le douziesme jour de decembre lan mil trois cens cinquante sept.

Audit seigneur Guichard de Beaujeu, seigneur de Perreux, qui fut tue à Poitiers, comme dict est, succeda son fils Eddouard, qui est celluy qui despuys donna la baronnye de Beaujeu au duc Loys de Bourbon, la vigille de saint Jehan Baptiste, lan mil quatre cens, luy estans a Parys par subtils moyens et induction.

Or est cy endroict a notter que messire Guillaume de Beaujeu, frere dudit Eddouard, de pere seullement, et dudit seigneur Guichard dernier nomme, de pere et de mere (la mere fut madame Jane de Chasteauvillain), fut seigneur dAmplepuys pour son partage de la succession de messire